

四庫全書

史部

欽定四庫全書

吳興脩志卷七

明 董斯張 撰

官師徵第四之六

州邑

漢嚴訢字少通治嚴氏春秋馮君章句為烏程長舉孝廉
遷東牟侯相下邳祝長典牧十城所在若神

趙明誠金石錄

費鳳烏程人試守故鄣長

洪适隸釋人物

吳駱統字公緒會稽人時飢荒鄉里及遠方客多有困

乏統為之飲食衰少其姊仁愛有行寡居無子見統甚
哀之數問其故統曰士大夫糟糠不足我何心獨飽姊
曰誠如是不告我而自苦若此乃自以私粟與統又
以告母母亦賢之遂使分施由是顯名孫權以將軍領
會稽太守統年二十試為烏程相民戶過萬咸嘆其惠
理權嘉之召為功曹行騎都尉妻以從兄女

吳志

孫河字伯海堅從子也出後姑俞氏後復姓為孫質性
忠直訥言敏行有氣幹能服勤少從堅征討嘗為前驅

後領左右兵典知內事待以腹心之任又從策平定吳

會從權討李術破之拜威冠中郎將領廬江太守

吳志

河為烏程長見吾粲傳

晉殷康為武康令教曰郭邑居民有死喪者可令送

兩坭粥

太平御覽

陶範字道則侃第十子也侃諸子中最知名歷尚書祕

書監

陶侃別傳

範烏程令見世說已入掌故

賀循字彥先山陰人節操高厲好學博聞舉秀才除陽
羨武康令顧榮陸機陸雲表薦之曰伏見吳興武康令
賀循德量邃茂才鑒清遠歷踐三城刑政肅穆守職下
縣州黨帖然召為太子舍人元帝時領太子太傅時朝廷
初建動有疑議宗廟制度皆循所定為一時儒宗贈司

空謚曰穆

虞預
晉書

張亢字季陽安平人載協弟也才藻不逮二昆亦有屬
綴又解音樂伎術時人謂協載亢陸機雲曰二陸三張

中興初過江領著作郎補烏程令入為散騎常侍復領佐著作郎

許裴字季顯義興陽羨人烏程令

晉百官名
參許氏譜

張按裴已載掌故弟不詳其邑里耳故出之

河內司馬颺為烏程令將赴職戴洋曰君宜深慎下吏
颺後果坐吏免官洋又謂曰卿雖免官十一月當作郡
加將軍至期為太山太守振武將軍

晉書

袁猷字中甫陽夏人少與兄瓌齊名尋相率渡江瓌為

丹陽令猷為武康令有政聲歷侍中衛尉卿

羊不疑太山南城人烏程令歷桂陽太守

夏侯惇郡人為烏程令孫恩自海襲會稽有衆數萬於是吳郡陸瓌吳興邱旭等凡八郡一時俱起殺長吏以應之吳興太守謝邈嘉興顧胤與惇等皆遇害

並上

冊府元龜胤作喬避宋諱耳

宋臧謏之東莞人元嘉中為尚書都官郎烏程令

以下沈約

書

劉亮彭城人大明中為武康令時境內多盜鑄錢亮掩討擒殺以干計厯封順陽侯厯梁益二州刺史

劉秀之字道寶東莞人司徒穆之從兄子也為無錫陽羨烏程令並著能名封康樂郡公厯尚書右僕射謚忠成

虞玩之字茂瑤餘姚人少閑刀筆泛涉書史仕宋為烏程令路太后親朱仁彌犯罪依法錄治太后怒訴孝武坐免官厯驍騎黃門郎

宋文帝以彭城王義康嫌隙既成乃誅劉湛及烏程令盛曇泰等曇泰為義康所逐

顧凱之字偉仁吳人元嘉中為東遷令後為吳郡太守風節過峻終湘州刺史謚曰簡子

張祐高平人歷武康錢唐令並著能名時有北地傅僧祐潁川陳珉並以吏才見知宋世言長吏者必以三人為首

何敬叔東海郟人也齊長城令有能名在縣清廉不受

禮遺夏至節忽榜門受餉數日中得米二千餘斛他物

稱是悉以代他人輸租

南史

裴松之字世期河東人博覽墳籍立身簡素義熙初為
故鄣令轉中書侍郎上使注陳壽三國志松之鳩集傳
訛廣增異聞既成奏之上覽之曰裴世期可不朽矣

荀卞之大明七年為烏程令

詳祥
學徵

江秉之字元叔歷烏程建康令遷臨海太守並以簡約
見稱在郡嘗作一書案去官留以付庫

王偉之為烏程令廉介特甚書籍之外家無長物

偉之少有志尚當世詔命表奏輒自書寫泰元隆安

時事小大悉撰錄之子韶之因此私自撰晉安帝陽

秋宋書

沈懷遠武康令

見隋經籍志

武康令謝沈

宋書蔡興宗傳

朱齡石字伯兒沛人也武帝以為鎮軍叅軍遷武康令

歷雍州刺史

張岱東遷令時殷冲為吳興太守謂人曰張東遷親貧
須養所以棲遲下邑然名器方顯終當致大位

岱詳見
郡守

沈攸之孝建七年為龍驤將軍武康令

沈文秀字仲遠武康人初為郡主簿功曹起家東海王

叅軍遷武康令

詳人
物徵

傅琰字季珪靈州人仕宋為武康令遷山陰令著能名

二縣皆謂之傅聖賜爵新亭侯元徽中遷尚書左丞琰
與父僧祐並有奇績時云諸傅有理縣譜子孫不以示

人時山陰令邱仲起長城令何敬叔故鄣令邱寂之皆有能名而不及琰也

南史

齊庾肅之孔欣之俱武康令肅之迎沈道虔為立宅道

虔隱居鄉里相率受學欣之厚為貲給焉

南史

南齊顧昌言烏程令坐父法秀宋泰始中戰亡遺骸不

反而昌言宴樂如常有司請加以清議

說傳

昌言

吳郡縣人

豫章文獻王蕭嶷字宣儼太祖第二子起家為太學博

士長城令

南齊書

傅映字徽遠靈州人爲武康令高祖師取建康吳興太守袁昂自謂門世忠貞固守臣節乃訪於映映勸背昏向明尋以公事免天監初除建安王長史烏程令所受俸祿悉以歸兄累遷光祿卿

蘇侃字休烈涉獵詩書宋時出身正員將軍補長城令

南齊書

何遠字義方郢人梁武踐阼以奉迎功封廣興男後爲武康令愈厲廉節除淫祀正身率職人甚稱之太守王

彬巡屬縣諸縣皆盛供帳以待焉至武康遠獨具糗水而已彬去遠送至境進斗酒隻鵝而別彬戲曰卿禮有過陸納將不為古人所笑乎武帝聞其能擢為宣城太守自縣為近畿大郡近代未之有也其輕財好義周人之急言不妄發盖天性也每戲語人曰卿能得我一妄語則謝卿以一縑衆共伺之不能記也

梁書

褚雲字士洋陽翟人為曲阿烏程延陵令並稱清慎歷御史中丞湘東王諮議參軍

陰鏗字子堅姑臧人善五言詩為時所重釋褐梁湘東王法曹行叅軍累遷晉陵太守員外散騎常侍有集三卷

鏗有罷故鄣令詩一卷見隋志

伏挺字士標平昌人好屬文樂安任昉深相嘆異齊末則舉秀才對策為當時第一高祖義師至挺迎謁于西林高祖見之甚悅謂曰顏子引為征東行叅軍時年十八天監初除中軍叅軍事累為晉陵武康令罷縣還仍

于東郊築室不復仕後出仕尋除南臺治書因事納賄
當被推劾挺懼罪遂變服為道人久之藏匿後遇赦因
此還俗太清中客遊吳興侯景亂中卒

范岫字懋賓濟陽考城人外祖顏延之早相品題以為
中外之寶仕齊為長城令歷梁吏部尚書

江蔦濟陽人淹子也襲封臨沮縣伯自丹陽尹丞為長
城令有罪削爵普通四年高祖追念淹功復封為吳昌
伯

殷不佞字季卿長平人少立名節居父喪以至孝稱好讀書尤長吏事承聖初為武康令上

沈文阿字國衛武康人仕梁為五經博士簡文在東宮引為學士及侯景寇逆簡文別遣文阿招募士卒入京師城陷與張嶷共保吳興嶷敗文阿竄於山墅景素聞其名求之甚急文阿窮迫不知所出登樹自縊遇有所親救之便自投而下折其左股及景平高祖以文阿州里表為原鄉令

以下
陳書

梁元帝於荊州即位授姚察原鄉令

察武康人
詳人物微

周弘正字思行汝南安城人梁都官尚書入陳歷國子

祭酒尚書右僕射諡曰簡子所著周易講疏十六卷論

語疏十一卷莊子疏八卷老子疏五卷孝經疏二卷集

二十卷行於世

隋經
籍志

弘正為安吉令見陳書

庾持字元德鄆陵人父沙彌長城令持篤志好學尤長
書記以才藝聞解褐為安吉令天嘉初遷尚書左丞以

預長城之功封崇德縣子歷大中大夫

徐秀郢人年十五擢高第歷德清長城丹陽三縣令

真顏

卿徐府君碑

王實唐宰相涯父也湖州安吉縣令贈尚書刑部員外

郎文苑英華王涯家廟碑

韋鐸京兆人烏程令

唐宰相世系表

孫尚復武邑人德清令

李濬後魏平棘令系之裔鄭遼滎陽人並武康令

並上

李寵渤海王裔烏程令

唐宗室
世系表

解禹字德禹天寶中舉進士為湖州安吉縣令用薦為

吉州刺史

解春
雨集

李清字士澄天寶十二年進士宰烏程嘗有咏石季倫

詩

唐詩紀事又見
顏真卿西亭記

韋承慶渤海人字延休鄭州陽武人也少恭謹事繼母

以孝聞弱冠舉進士累遷太子司議郎儀鳳中太子賢

監國頗近聲色承慶上書諫之承慶又以人之用心多

擾濁浮躁罕詣冲和之境乃著靈城賦以廣其志調露
初東宮廢出為烏程令風化大行歷天官侍郎兼修國
史承慶自天授以來三掌天官銓授平允海內稱之尋

同平章事

舊唐書

武康響應山下有碧玉潭神龍所居神龍八年令劉訥

禱雨而應

勞志

權逢吉為長興令時縣西有西湖可溉田三千餘頃舊
引方山泉注之為豪家所堰莫敢誰何逢吉決堰仍引

泉溉田鄉人賴焉

浙江通志

崔孚博陵人歷湖州長城令長城之理加於前二邑令政

成秩滿解印罷去

白香山集

李某元和十年烏程令

見談志德清覺海寺條下李誤作米

王晏弘農人武康令

見權德輿王妣夫人楊氏墓志

獨孤及字至之洛陽人武康令歷常州刺史

唐書

胡傳美唐武康令有游碧落觀詩

稿簡贅筆見藝文

李府君諱晤歷金壇烏程晉陵三縣令府君為人篤於內

行飾以吏事動有常德居無惰容所蒞之邑有善政辭

滿之日多遺愛

白居易趙邵李公家廟碑

晤宰相紳之父也

見唐書

皇考湖州德清令諱察躬行孝悌之德振揚家聲

柳子厚叔

父殿中侍御史墓志

喻鳧毘陵人有詩名開成進士全唐詩話云卒於烏程

令

西吳里語

鳧字坦之嘗謁杜紫薇不遇曰我詩無羅綺鉛粉氣

宜不售也

宜興志

宋裴大亮大理寺丞知長興縣

見胡宿為謝安置守冢表

曾士倬禺山人知烏程縣

東林山志

劉嘉成政和戊戌進士知德清縣歷判楚州

武義縣志

章望之字表民浦城人除知烏程縣趣令受命固辭以

光祿寺丞致仕

宋史

望之伯父得象廕得官以宰相嫌遂不仕

文獻經籍考

王正己湖州德清縣令

王安石吏部侍郎句公墓志此又一王正己也

齊融號衡山居士與王正已相友善一時名士也

氏族

大全

陳洙字師道建陽人令烏程與王安石遊安石有詩送

之

瀛奎律髓

陳洙字師道登進士第歷殿中侍御史嘉祐中上疏
助司馬光乞早建嗣且曰陛下以臣為懷異日之圖
莫若殺臣之身用臣之言疏方上即仰藥以卒奏下
大計遂定仁宗聞洙死賜錢百萬元祐初用光言官

其一子

八閩通志

詹祥字周文宗安人祥符元年進士烏程令

石元之新昌人天聖五年進士烏程令

蘇耆字國老叅知政事易簡之子舜欽之父也有才名

嘗宰烏程歷工部郎中直集賢院贈刑部侍郎

宋史叅東坡劉

夫人墓志米襄陽志林
四川志耆見郡志

方仲弓烏程令

天聖七年有小臣方仲弓請立劉氏七廟魯宗道諫

而止 通鑑

明道士申河南竇克知德清縣始作聖廟值巽之隅文

雅之士班班出焉

沈與求重修孔廟碑

狄遵孔字子安湘潭人以父任在安吉時馬尋守湖州

少公恐不任事安吉大姓俞氏所為多不法前後令多

不敢擊俞氏私釀酒椎牛會客公捕得劾治尋大驚曰

乃能如我少時

黃山谷
狄公志

柯述字仲常南安人知湖州歸安縣修水田蓄洩之利

八閩
志

謝伯宜字仲聖龍溪人知湖州長興縣開水利蝗不入
境諸臺以聞遷奉議郎賜緋歷任凡六司議讞者四平
反者多上

錢顓字安道無錫人知顓烏程二縣皆以治行聞治平
末為殿中侍御史許遵議謀殺刑名未定而入判大理
顓以為一人偏詞不可以汨天下之法遵所見迂不可
以當刑名之任不從二年而貶將出臺責同列孫昌齡

曰君媚事王安石得為御史亦當少思報國奈何將欲
附會以求美官顏自當遠竄君自謂得策耶拂衣上馬
去後自衢徙秀州家貧母老至丐貸親友以給朝脯而
怡然無謫官之色

宋史

李餘慶字昌宗以叔父任起家應天法曹叅軍遇事輒
爭之留守者不能奪也卒薦公改太常寺太祝知湖州

歸安縣歷知常州

王安石
李公志

沈兼字子達明州人遷衛尉寺丞知湖州歸安縣

王安石
石沈

君墓

志

陸廣字彥博侯官人天聖二年進士令烏程

王安石陸君墓志

尹熙古天聖中以中大夫行國子博士護軍知安吉縣

安吉

志

孫載字積中崑山人治平三年舉進士初為河中府戶

曹遷德清令開說是非出於至誠訟有累年不決者聞

載一言即感悟棄去熙寧八年杭秀湖三郡饑載諭富

室倍糴至明年平其價出糴一邑之民賴以全活

浙江通志

陳吉老字子州仙遊人歷知揚州與韓世忠戮力恢復
秦檜主和議吉老累疏爭辨請出逐之贈奉直大夫

八閩

志

吉老知長興見郡志

陳輔字安國明州象山人嘉祐二年進士第歷著作佐
郎知安吉縣歲饑籍富家出粟食流民所活以千計將
代民詣郡及使者言古之循吏所去見思我曹於陳君
不待去而思思其將去而不樂也使者知其才命攝華

亭徙攝壽昌時王介守湖請使者曰安吉不可以無陳君也乃得歸道聞其繫囚衆以旦至邑遽開牖有競渡毆人死至繫百人者且情得矣即械應法者於州餘悉遣去幕庭為虞人歡舞天目山水溉一邑其附山六鄉為防專利而下二十一鄉請決堤主簿劉璿視之千餘人擁璿鬪堤下璿走還君徐以他事至旁佛舍召六鄉老人諭散之與約決堤三日慰二十一鄉民老人唯爭趨令而溪悍猛既決則三日不能復下鄉用穰朝廷初

以七十五等定家業均役錢使者厲君立浙西法而翰林沈公括方察訪二浙遽言於朝遂推其法浙東

晁無咎陳

君墓志

張著河間人嘉祐中以秘書丞知安吉縣

安吉志

許遵字仲塗泗州人第進士又中明法擢大理寺詳斷官知長興縣興水利邑人立石紀之遵出知壽州潤州又請提舉崇福宮尋致仕累官中散大夫

宋史

陳察海州人為宣德郎知烏程縣事某與烏程同年進

士烏程允篤君子也與余雅善

沈括長
興集

冷源元符中任武康令

萬姓
統譜

毛滂字澤民元符中令武康嘗築東堂於衙齋有生遠

樓畫舫並潛玉菴清泉修竹率多遠韻滂時作長短句

聲文道媚緝之為東堂詞薦山溪一序尤膾炙人口東

坡稱其文章典器可備著述

勞志叅東堂
詞文獻通考

蘓子由送滂詩云酒腸天與渾無敵詩律家傳便出

人樂城
集

滕中字元直甫子以廕補官歷知安吉有美政終承議

郎廉勤自將治民守邊所至有聲尤長於詩

萬姓統譜

王勲郢人政和八年進士紹興七年知湖州長興縣有治聲高宗皇帝以廣南舶政大弊命擇士人修潔者為之樞密沈公與求以勲薦既對擢提舉市舶果以清裁

著名贈金紫光祿大夫

樓攻媿集

勲子正己見郡守

吳桓字孟文龍溪人熙寧間陳三要三術甚切時務元

豐八年進士以奉議郎知湖州長興縣

楊龜山集
八閩通志

林概字端父福清人舉進士以秘書省校書郎知長興縣歷知連州康定初上封事謂古者民為兵而今兵食民古馬寓於民而今不習馬此兵與馬之大患也又行陣無法而出於臨時將無素備而取於倉卒軍不予權而監於宦侍若是者雖得古之材使循今之法亦必屢戰而屢敗官至集賢校理

宋史
江通志

林槩知長興歲大饑出俸粟誘富人輸數千石以飼

飢者

八閩志

丁大聲知武康縣程大昌之壻也

周必大程公墓志

孫旼字無逸紹興元年知錢唐縣以讒謗免所居官公議訟公非罪差建寧府糧料院未赴改湖州安吉縣歷

簽書鎮江判官

孫覲撰墓志銘

徐良能字彥才紹興五年進士知安吉竭力賑艱食之民除水災之賦民為之繪像祀於學宮及刻石以紀其政去之日爭致贐一無所受待次家貧至出產以給食

處之泰然歷龍圖閣侍制

蘭溪
邑志

范鎔字茂寬知武康父老訴前令定物力溢故者十餘萬科輸不前欲更之吏白板已上郡須三歲可改曰是困吾民一日不可可三年乎立除其十之二繼列其弊白於郡追易前板民以為利

上

乾道六年知湖州長興縣茹驤坐贓免編管台州仍籍沒家財叅知政事錢良臣奏臣昨任淮東總領日失舉茹驤改官今以贓敗法當同坐詔覽良臣所奏乃欲以

身行法國有常憲朕不敢私勉從所請可鐫三官於是

陳峴張宗元趙礪老徐本中並坐舉驤各降三官

文獻通考

見登科錄

茹驤之字曰伯駿嵯縣人紹興戊辰進士

史岩之知長興縣嵩之弟也

見葉水心史進翁墓志

錙有開迪功郎安吉州烏程令

歐陽立錙更立墓碑

陳希莆田人通直郎知武康縣

樓攻媿陳居仁行狀

林大中紹興三十年進士調左迪功郎湖州烏程縣主

簿貪甚俸薄郡欲日有贈餽卒謝之所立已如此淳熙
七年知湖州長興縣縣在浙右號稱難治公益究心官
事民情孚洽若有相之者歲饑官無贏蓄公方憂慮而無策
夜半湧水自荻浦灌河聲震數里米舟輻輳闔境以為
神和買比經界前增四之三公必欲寬之推見衆弊獲
免者五千餘戶增輸以實者帖給訟牒必竟曲直不許
私和或謂恐益多事公曰此乃省事之法也以是詬訟
日稀期限寬而信可展而不可違去如始至所下文移

無一紙遺於民間

樓攻媿林正惠公
神道碑永康縣志

大中字和叔歷中書舍人給事中以忤韓侂胄罷歸
或勸通侂胄書對曰福不可求吾為省郎時一言承
意豈至今日耶客曰縱不求福盍亦免禍對曰福不
可求而得禍可懼而免耶侂胄誅即召見試吏部尚

書簽書樞密院事謚正惠

宋史

詹儀之遂安人時張栻守郡呂祖謙分教儀之以學

問為事嘗宰烏程終吏部侍郎

談志參
嚴州志

儀之字體仁從晦菴先生游見朱文公大全書問中
時又有門人詹體仁字元善者亦從文公遊吾郡寓
公也

方道字夷吾嚴州人淳熙八年以通直郎知湖州武康
縣武康密邇行都易致越訴君律身既嚴剖決公平不
科罰一錢寬猛得宜訟亦衰少縣出絲纈賴以濟稅課
郡利其美使別儲以候命縣無所從出商人患苦倍征
旁出山蹊公私交病君請於郡復舊規蠲宿逋申法禁

減則例以招之曾不踰時來者輻輳井邑為之改觀米
運至豐儲倉退却至數百斛典吏鬻妻子不足以償君
為於他州賤糴取贏以補其數又以餘貲代下五等畸
稅義役良法也行之或反以致害君更立規式勸諭誠
篤民咸信之追科不事鞭扑間出郊墊食用百須皆隨
無纖粟之擾於是爭先就役他縣至取以為法後有欲
更張者老幼叩閭幾二千人竟仍其舊嘗久雨有怪民
出昌言水且大至人皆悚懼謀避亟捕至庭焚其書械

繫以俟既不驄杖而逐之有訴夫久出不還知其必死而迹不明者君為設方畧得姓徐者一問即承境內盜賊帖息雨暘致禱多驗洊值豐年上下熙然提刑劉公頴行部謂太守曰自蘓至此惟武康無一詞致前蓋君專務行所學視四境如一家不表暴以取赫赫名而民受實惠其去也遮道挽留越境追送者不以數計終淮南安撫司叅議官所著有覺齋聞見錄

樓攻媿方君墓志

宋蔡開字子明崇德人淳熙辛丑第進士宰德清值軍

興征調縣為不擾及去民攀留之歷知邵武著畏集

十五卷

萬姓統譜

蕭德藻烏程令楊萬里淳熙薦士錄云德藻文學甚古氣節甚高其志常有為其進未嘗苟合老而不遇士論

屈之今為湖北叅議官

德藻詳見掌故

鄭昭先字景紹閩縣人淳熙進士初主浦城簿嘆曰僥倖一第問學未悉遂游朱文公之門遷知歸安邑民愛之累官知樞密院事兼叅知政事進右丞相辭不拜立

朝累有奏疏言皆切直謚文靖有闕湖遺稿五十卷真

德秀為序

八闕志

莫若冲字子謙淳熙乙未進士尉湖之安吉郡委聽斷

爭者心服改秩知安吉邑人交慶以平允稱

崇德志

徐浚字明道紹興甲戌進士始尉德清有聲改秩知烏

程多惠政

上

俞應符字寶文錢唐人歸安令嘉定十四年自給事中

除簽書樞密院事

蔣重珍字良貴無錫人嘉定末進士第一簽判奉國軍
理宗召入對首以自天子以至庶人所當知者本心外
物二者之界限為言次論苞苴盛行民為其害遷校書
郎辭不就明年待命雲川移文閣門請對當路憚之尋
知安吉州歷官刑部侍郎致仕諡忠文

宋史

趙與權字悅道宋宗室嘉定進士以直寶章閣知安吉
州有富民懇幼子察之非其本心姑逮其子付獄徐廉
之乃二兄強其父析業與權曉以法開以天理皆欣然

感悟又娶媼僅一子亦以不孝告留之郡廳日給廳饌俾親饋晨昏以禮未周日母子如初二家皆畫像事之歷戶部侍郎權兵部尚書嘗謂士大夫有貪聲則雖竒方與學徒以蠹國害民耳追封奉化郡王

宋史

衢按郡志前事逸之後事以為二子悞且逸畫像句趙渚字伯遠淳熙間為長興令邑蝗渚募力收捕至三千餘石又大旱河竭米價騰湧渚出官錢增直糴粟商輻輳人皆得濟士民咸德之

浙江通志

諸葛千里烏程令

詳主簿
呂午條

陸景文字叔辨為安吉令

松江
府志

趙彥衛字景安紹熙間宰烏程有能名歷通判徽州有

雲麓漫抄二十卷續鈔二卷

書錄
解題

余端禮字處恭龍游人第進士知烏程縣累遷吏部尚

書同知樞密院事少保卹國公贈太傅謚忠肅

宋史

蔣峴字伯見奉化人性剛不阿慶元二年進士令武康

有治聲

浙江
通志

寶慶丁酉火災議者以為濟王之寃殿院蔣峴謂火災止是失脩更無餘說且云君臣已定父子不可言兄弟不當問此周公謹所誌者又宋史王邁傳云蔣峴附彌遠邁劾之按此則峴為能更不可謂純臣矣

顏逸顏子四十一代孫武康令

聖門志

章鑑字君保嘉熙中令餘杭志確而衆信操潔而吏莊慮深而弊淺俗和刑清遠慕近悅

謝夢生東萊讀書堂記郡志入古蹟類今

出之

張按晚宋有兩章鑑一字公秉分寧人咸淳間拜右丞相所稱滿朝懽者其人也君保為昌化人見癸辛

雜識

李芾字叔章衡州人知德清縣屬浙西饑芾置保伍賑民活數萬計遷主管酒庫所德清有妖人扇民為亂民蜂起附之至數萬人遣芾討之盜聞其來衆立散移浙西提刑時浙西多盜羣穴太湖中芾跡得其出沒按捕之盜駭散

宋史

韓補玉山人奉議郎知安吉州武康縣

程洺水集

衢按勞志有韓亞卿宣即其人

安吉州歸安令黃申

戴表元劉陽教授李君志李餘姚人申之外孫按勞志有黃聲

梁琮字宗本相臺人至元中宰長興慨然以敬教勸學為急敦詩書禮逢掖每儒官教授必親至講室與諸生

疑難答問質判精微胥吏文無害者咸在列聽率至夜

分乃罷

高純厚長興修廟學記

魏信為歸安令博聞強記終日端坐人莫敢干以私者

時定浙西坊里之役信以田為率貧富均一民懷其惠

勞志

趙孟實黃岩人宋宗室知長興縣

黃岩
邑志

沈拱辰字國祥吳縣人至元丁丑尹安吉鋤強植弱奸

豪屏迹事至立決吏受成而已

浦志

李拱辰字廷弼滄陽人皇慶二年春升承值郎湖州路
歸安縣尹邑附於郡事多掣肘公守法不附有爭家財
而骨肉相戕者諭以天理感悟而去有以死獄誣平民

者折以片言遂伏其辜京師貴近有指邑民之妻為其
逃婢者中使督捕甚急公不為遣卒歸其夫每歲二稅
先期至者輒勞以羊酒人皆知勸莫敢自後前是土田
多荒責里胥代輸其祖公屏吏卒步入阡陌間視地之
肥瘠定為歲入之數募有力者使墾種之有旨經理田
土奉行者率務增加以為功公不苟隨聽民自占主者
以所增田僅百五十頃議倍加其賦公曰吾官可棄民
不可病也卒從公言仍其舊臺省交章舉公廉能延祐

四年夏除承德郎中書戶部司計

黃渭李公志

衢按郡志俱以字為名宜改正

張炯字元明武康縣尹築渠堰禦水患民賴其功終湖

州府尹

崇德志

張炳字元暉炯弟安吉縣尹循良著績有去思碑上

杜遂德清令

金華縣志

按勞志有呂遂豈姓誤與

僧勞別名已哩承務郎烏程縣達魯噶齊

程雪樓秦國先墓碑

欽定四庫全書

吳興倫志

文

趙桂縉雲人延祐間烏程縣尹

黃學士集
括蒼彙志

朱德潤字擇民崑山人工詩文延祐末遊燕趙孟頫薦之召見命為編修明年授鎮東儒學提舉以歸喀喇庫庫袁楠皆與友善後攝守長興至則市無一人乃郊召父老告之以其故仍即印號給其照身以識別乎寇且曰汝所怖者官軍耳保此則官軍不汝犯於是黎民麋集未竟日得戶萬四千八百九十九尋以病免有存復

齋稿十卷

姑蘇志參
虞伯生跋

曹宗輔至順中知德清縣修令示人而人自避之愛民

如子既去邑人立去思碑

一統志

沈夢麟郡人至正間為武康尹不尚刑罰吏民畏服

勞志

哈喇哈達字得之北庭人至正十三年為長興州達魯

噶齊風采政事皆可稱

楊廉夫長興州廟學記

于文傳字壽道平江人延祐二年乙科遷烏程縣尹烏

程有富民張甲之妻王無子張納一妾於外生子未晬

王誘妾以兒來尋逐妾殺兒焚之文傳聞而發其事得死

兒遺骨王厚誘妾之父母置鄰家兒為妾所生兒初不死文傳令妾抱兒乳之兒啼不就乳妾之父母吐實乃呼隣婦至兒見之躍入其懷乳之即飲王遂服辜時韓鏞僉浙西廉訪司事作烏程謠以紀其績文傳官至嘉議大夫禮部尚書嘗考試浙江鄉闈所取士後多知名為文雅正其於政事為尤長云

元史

韓約字彥禮真定人知長興州有蒙古人奪民妻女前此莫敢誰何約至舉正其罪下若寺僧為仇人誣吏右

仇相為根抵累年不決約辨其誣釋之善政多類此

江浙

通志

牟應復獻之次子歸安縣尹有政聲

勞志

楊景行字賢可泰和人舉進士歷撫州路推官轉歸安縣尹年七十以翰林待制朝列大夫致仕平生所歷州

縣有惠政民立石頌之

吉安府志

黃以貞連州人德清令以政事聞

宋學士集

德清縣達魯噶齊布呼齊河西人縣尹蘓靖臨清人

黃潘

德清縣學

祭器集記

虞安澤常熟芝溪人勝國時任德清尹

宋濂書虞思齋事

州邑佐

丞

主簿

尉

蔣靜曾遇趙廷入掌故不錄

蘇頲字廷碩武功人司徒瓌子頲少有俊才一覽千言
弱冠舉進士授烏程尉歷遷紫薇侍郎與宋璟同知政

事璟剛正多所裁抑頤皆順從其美若上前承旨敷奏及應對則頤為之助相得甚悅璟嘗謂人曰吾與蘇家父子前後同時為宰相僕射長厚誠為國器若獻可替否罄盡臣節斷割吏事至公無私則頤過其父也

舊唐書

王紹字德素太原人以厚實為士友所重顏魯公守吳興特器之表授武康尉

李絳王紹志

許授循理喻義調武康丞滿歲葺田廬於雲溪之上忘

懷進取

權德輿許君夫人韋氏墓志

薛鑄汾陰人烏程尉

唐宰相
世系表

李金趙郡人武康尉

上

李文約隴西人安吉主簿

唐宗室
世系表

李實烏程尉

上

大歷中烏程尉陳褒撰昇望記

談志

李忠烏程尉

文苑英華
薛廷珪制

杜登襄陽人武康尉

杜甫廬太
君墓志

潘述長城丞

杼山
碑

盧綸有送潘述下第詩

趙令則天水人安吉縣丞上

吳越時鍾廷翰攝安吉主簿

堯山堂偶鵠

梁王耕睦州桐廬人烏程縣丞

張棧王緒墓志

吳越時奉梁正朔故云

宋周詵道州永明人歸安主簿

宋史歐陽修周君墓表

任適烏程尉梅堯臣有詩送之

宛陵集

蔡昕字景叔嘉祐六年進士調歸安主簿事敏而達太

守張田及沈杭州遺皆器其為人

朱樂圃
餘稿

錢先芝校書集賢院調烏程桐廬二縣尉遷寧德令

沈
遼

錢升卿

墓志

錢世雄字濟明武進人吳興尉

見參寥詩東坡集峴山志

濟明號水華居士公輔君倚之子也見東坡跋君倚

書

周古武康尉趙清獻有詩送之

詩載
藝史

韓球字伯玉相州人授德清尉發奸摘伏如老于從政

者

韓魏公長兄德清尉墓志 球即公彥之父也

烏程縣主簿張次道

余武溪李虛舟志

胥茂謹敦厚敏達學問自將調湖州烏程縣主簿

黃山谷胥

夫人謝氏志

茂謹長沙人元衡子也

見南豐集

郭周子孚字仲光建安人事母至孝熙寧間調德清簿遷閬縣令嘗游蘇軾之門聲稱藉甚

潘景夔字和叔松陽人初為德清尉邑有富民為盜所

掠躬捕獲二十人法當改秩同寮賀之景夔愀然曰是
得無誑悞者耶若以幸賞為心則吏卒鍛鍊以成獄吾

不忍為也同僚嘆服

括蒼
彙紀

何備字德輔龍泉人登紹興進士調德清縣主簿時和
好初成備哀少康宣王光武元帝事可施行者為評議
號中興龜鑑上之除紹興府教授累官工部侍郎上

方懋德字元相宣州南陵人宣和三年賜上舍出身調
湖州武康尉武康之乞人丐於沈氏遺之不滿其意堅

卧不去數日死沈氏之仇告其殺人獄乃疑吏甚恐尉

至即得其實一邑皆驚上官聞尉能交口爭薦用吏部

關陞法遷左從政郎

周紫芝方君志

孫邈字明遠晉陵人授將仕郎安吉主簿邑大事劇君

以廉恪協贊令治吏使者交薦之

鄒浩孫叔權志

德清縣令徐良佐

鄒浩孫叔權志

烏程縣丞劉似

鄒浩林夫人志

武康尉王驥

鄒浩蘇公行狀

劉祕莆田人元豐二年進士宣德郎烏程縣丞

八閩志

周邦績元豐中長興尉

詳見金石徵

馬友直字伯忠建炎二年以累舉主武康簿

姑蘇志

李端友紹興十八年迪功郎添差歸安縣尉二十二年

德清縣尉

孫鴻慶居士集

趙傳霖慶元二年進士德清主簿

永康縣志

林栻大中孫以廕為歸安主簿

上

陸三省長興丞趙汝柳長興簿

長興志

吳逢惠安人德清簿

八閩志

陳覲豐有後史岩之陳諱俱長興尉

長興志

王檻三衢人通直郎湖州德清縣丞

劉漫塘集

洪秉哲字晦叔丹陽人嘉泰二年進士歷歸安簿遷嘉

興通判直寶章閣

鎮江府志

沈與求攝歸安尉

見龜溪集

趙希白宋宗室烏程縣主簿

見樓攻媿趙公墓志

秦鉅武康縣丞

見樓攻媿史浩神道碑

陸簾烏程丞陸龍武康尉

見陸游王
令入志

俱會稽陸游子簾歷知江州

王伯廣字師德常熟人紹興十二年進士調德清尉歸鄉里悉以家產與諸弟伯廣文章出於天性尤工於詩四六亦為人贈炙與張孝祥友善所著聽雨集藏於家

姑蘇
志

迪功郎烏程主簿張端節

葉水心
李公志

孔端直字子固通直郎湖州武康丞

聖門
志

吳交如字亨會金壇人登紹興十五年進士為烏程尉再
中法科入為大理評事歷大理卿明年獄空璽書嘉獎

性樂易稱為長者

鎮江府志

湖州武康主簿毛密

見周益公黃石墓志

張士能吳郡人烏程尉

見周益公張廷傑墓志

烏程尉朱昂

夷堅志

乾道六年左迪功郎新武康尉劉煒

入蜀記

王賁之乾道壬辰進士長興丞

諸暨邑志

曾棠文清公幾孫迪功郎長興尉丁松年文林郎長興

丞

陸游曾文清墓志

徐天祐字受之山陰人銓試詞賦第一歸安尉

紹興府志

方淑字智善德清丞著春秋直音三卷劉給事一止為

作序

文獻通考

潘方字仲矩安吉尉

西吳里語

王從維揚人右承事郎湖州長興縣丞

呂東萊王居正行狀

貝欽世字聖美登紹興二十四年進士調武康丞居官

廉介太守王十朋表薦之改令江陰歷建康簽判

上虞志

冷世光字賓王常熟人紹興元年進士調歸安簿

姑蘇志

黃廡新昌人從事郎長興簿

葉水心黃仁靜墓志

詹體仁浦城人第進士為歸安丞歷直龍圖閣徙居茗

雲翫惕水石誦讀悠然歷司農少卿

葉水心集詳寓公徵

應儋字自得昌國人六歲能詩登紹熙四年進士調烏

程尉議毀淫祠獨存徐孺子廟隣邑有沈氏兄弟訟財

郡檄儋按實儋委曲開諭適沈有子魁鄉薦因賦詩儼

之有云嘉木灌叢春意好可憐不種紫荆花兄弟感悟

其爭遂息官至文林郎

萬姓統譜兩浙名賢錄

吳曦迪功郎主湖州武康簿

周益公林保神道碑

章質夫迪功郎歸安縣主簿

楊誠齋余端禮墓志

張彥清字叔澄浦城人紹熙初登第安吉縣丞從朱子

游得其大指又與李公呂游質疑辨惑造詣日深故見

理明而自信篤終其身勿畔焉

真西山為作墓志考亭淵源錄

張即之字溫夫叅知政事孝伯之子以父恩授承務郎

烏程丞寶祐四年余晦入蜀以讒劾閬州守王惟忠下
詔獄鍛鍊坐棄市即之雖閒居移書言於制置司賈似
道恤其遺孤未幾似道入相給還首領以禮改葬多即
之倡義云即之以能書聞天下

宋史

呂午字伯可歙縣人嘉定四年進士授烏程主簿



吳興脩志卷七

欽定四庫全書

史部
吳興備志卷八

詳校官編修_臣曹振鏞

檢討_臣德生覆勘

覆校官主事_臣龔敬身

校對官主簿_臣汪日贊

謄錄貢生_臣李玉瓚

欽定四庫全書

吳興脩志卷八

明 董斯張 撰

人物徵第五之一

費汎字仲慮烏程人察孝廉除郎中屯騎司馬遷蕭令
視民如子先教後罰在位九年奸寇不發三年不斷獄
禎祥感應時沛有蝗獨不入界國以狀聞拜梁相汎二
子鳳堂邑令政九江太守汎卒政子均立碑紀之

洪适
隸釋

費汎
碑

按汎已載郡志但語太畧耳志所据當亦此碑中
僅有先教後罰一語志易之為賞罰嚴明無論詞不
雅馴失立碑者本指矣茲稍節漢碑錄之詳見菴文
費鳳字伯簫踐郡右職三貢獻計辟州式部忠以衛上
漢安二年吳郡太守郭君以君有自公之祿年三十一
舉孝廉拜郎中除陳國新平長靜而為治匪煩匪擾功
成事就色斯高舉退已進弟不營榮祿栖遲歷稔鄣土
不庭黔民作慝試守故鄣長强者綏以德弱者撫以仁

牧守旌功轉堂邑令垂拱不言而民化之祖業良田畝
直一金推予弟息鳳以熹平六年卒故鄣施業字世堅
偕堂邑義民戚忠治其喪鳳妻之弟卜胤及甘陵石勛

子才皆諱之鳳孫字元宰

參隸釋費鳳
二碑詳藝文

張按鳳弟九江太守政碑所云退己進弟者卽政也
鳳父子郡志亦載其畧乃悉取漢碑芟之殊令觀者
惻惻嗟乎漢隸之傳今茲者僅一二三碑真拱壁哉

漢平帝時有邛俊者持節安輯江淮屬王莽篡位遂留

江左居烏程漢大司馬騰交州太守聰陽羨令昭宋尚書右丞淵之新安太守道護建安太守道成梁黃門侍郎遲雜見於王儉姓系元和姓纂諸書

張按漢有兩邱騰其一冲帝時九江太守

姚氏漢青州刺史恢尚書左僕射皓吳太常卿信晉九江太守渠墓皆在郡境有碑姚之居吳興也久矣姓氏書謂王莽封田豐奉舜祀豐子恒避莽亂過江居吳郡改姓為姚五世孫敷復改姓姚始居武康敷生信信子寧

海太守陶陶子太傅奮奮六世孫僧垣子察察隋蜀王友自晉至梁多顯人藏散騎常侍宣業吳興郡公武韞璿壽欽文祥六人皆給事中

鈕氏漢有關內侯馥而冲充皆以牧守襲爵其為姓舊矣又名綽者東漢荆兗青三州刺史衡九真太守詳富春侯淑吳尚書令臨水侯瑒晉察孝廉龍臨水之封胤東遷侯淑及宋御史中丞滔墓同境必其後也吳景帝有鈕后陳武宣章后本亦鈕姓上

錢讓字德高吳郡烏程人累遷廣陵太守都督九江諸
軍事徐兗二州刺史封富春侯食邑五千戶卒年六十
二贈富春公謚曰哀天子臨弔哀慟給兵吏一千人加
威儀還葬本鄉賜錢十萬黃金百鎰錦被十張與讓母

趙氏

勞志

沈戎字威卿戎長子鄴字聖通第二子澍字仲高安平
相少子景河間相演之慶之曇慶懷文其後也仲高子
鸞字建光少有高名舉茂才公府辟州別駕從事史時

廣陵太守陸稠鸞之舅也以女妻之子直字伯平州舉
茂才亦有清名子瑜儀俱少有至行瑜十歲儀九歲而
父亡居喪毀瘠過於成人外祖盛孝章漢末名士也深
加憂傷每撫慰之兄弟並以孝著儀字仲則篤學有雅
才以儒素自業時海內大亂兵革並起經術廢弛士少
全行而儀淳深隱默守道不移風操貞整不妄交納惟
與族子仲山叔山及吳郡陸公紀友善州郡禮請二府
交辟公車徵並不屈以壽終子憲字元禮左中郎將新

都都尉定陽侯才志顯於吳朝子矯字仲桓以氣節立
名仕為立武校尉偏將軍孫皓時有將帥之稱吳平為
鬱林長沙二太守不就

沈約家
書自叙

沈戎子孫見史傳者一百五十八人三十八人有正
傳一百二十人附傳宋梁陳間皇后三人尚主者五
人唐沈君諒相武后睿真太后亦曰吳興人至今人

物視三姓為盛云

談
志

沈豐字聖達一云聖通永平中為郡主簿後遷零陵太

守為政慎刑重殺罪法辭訟初不厯獄嫌疑不決一斷
於口鞭杖不舉市無刑戮寮友有過初不暴揚有奇謀
異畧輒為談述曰太守所不及也到官一年甘露降芝
草生官至尚書令

東觀記參沈約自叙郡
志載而不詳故備錄之

吳郡沈豐為郡主簿太守第五倫母老不能之官倫
每至臘節常感戀垂泣遣豐迎母廣陵母見大江畏
水不敢渡豐祭神令子孫對母飲酒醉卧便渡

謝承
後漢

書

沈景戎之少子永建中為侍御史時河間王政狠傲不奉法帝以景素強毅擢為河間相景到國謁王王不正服箕踞殿上侍郎贊拜景峙不為禮問王所在虎賁曰是非王耶景曰王不正服常人何別今相謁王豈謁無禮者耶王慚而更服景然後拜出詣王傳責之曰前發京師陛見受詔以王不恭使相檢督諸君空受爵祿曾無導訓之義因捕諸奸人奏案其罪出冤獄百餘人政遂改節悔過自修子彥荊州刺史孫嘉晉吏部尚書

後漢

書河間王傳及朱子綱
目參唐宰相世系表

沈景為河間相拜二十石妻子不厯官舍五日一炊

常食乾糲

謝承後漢書

沈友字子正吳郡人年十一華歆行風俗見而异之因
呼曰沈郎可登車語乎友逡巡却曰君子講好會宴以
禮今仁義凌遲聖道漸壞先生啣命將何以裨補先王
之教整齊風俗而輕脫威儀猶負薪救火無乃更崇其
熾乎歆慚曰自桓靈以來雖多英彥未有幼童若此者

弱冠博學多所貫綜善屬文辭兼好武事注孫子兵法
又辯於口每所至衆人皆默然莫與為對咸言其筆之
妙舌之妙三者皆過絕於人孫權以禮聘既至論王伯
之畧當時之務權歛容敬焉陳荊州宜并之計納之正
色立朝清議峻厲為庸臣所譖誣以謀反權亦以終不
為已用故害之時年二十九

張勃
吳錄

沈珩字仲山吳郡人少總經執尤善春秋內外傳孫權
以珩有知謀能專對乃使至魏魏文帝問曰吳嫌魏東

向乎珩曰不嫌曰何以曰信恃舊盟言歸于好是以不嫌若魏渝盟自有豫脩又問聞太子當來宜然乎珩曰臣在東朝朝不坐宴不與若此之議無所聞也文帝善之乃引珩自近談語終日珩隨事響應無所屈服珩還言曰臣密叅侍中劉曄數為賊設奸計終不久慙臣聞兵家舊論不恃敵之不我犯恃我之不可犯今為朝廷慮之且當省息他役特務農桑以廣軍資修繕舟車增作戰具令皆兼盈撫養兵民使各得其所延攬英俊獎

勵將士則天下可圖矣以奉使有稱封永安鄉侯官至

少府

吳書

珣使魏時為西曹掾見吳志

武康舊名永安屬吳郡武康之沈前史但云吳郡人
沈仲山見休文自叙武康有五官瀆吳五官中郎將
沈珣所居乃吳書亦以為吳郡人可証也沈自唐以
前吳興而外無聞人沈友為武康產明矣

朱治字君理以年向老思戀土風自表屯故鄣以為鎮

撫山越諸父老故人莫不詣門治皆引進與共飲食鄉黨以為榮子才素為校尉領兵既嗣父爵遷偏將軍才弟紀權以策女妻之亦以校尉領兵紀弟緯萬歲才子琬襲爵為將至鎮西將軍

吳志

吾粲字孔休烏程人仕吳與吳郡陸遜卜靜等比肩齊

聲孫權召為主簿

吳志

沈陵字景高矯子也晉元帝為鎮東將軍命叅軍事子延字思長潁川太守始居縣東鄉之博陸里餘烏村延

子賀字子寧桓冲南中郎叅軍賀子景字世明惇篤有
行業學通左氏春秋家產累千金為東南豪士無進仕
意子穆夫字彥和坐孫恩妖黨見戮

沈約
宋書

陳敏據江東子弟凶暴所在為患周玘顧榮之徒常懼
禍敗遣使密報征東大將軍劉準遣兵臨江已為內應
準遣揚州刺史劉機寧遠將軍衡彥等出歷陽敏使弟
祖及將軍錢廣次烏江以拒之錢廣家在長城玘鄉人
也玘潛使圖祖廣遣其屬何康錢象投幕遂白事於祖

袒傾頭視書廣揮刀斬之稱州下已殺敏敢有動者夷
三族吹角為內應先勒兵在朱雀橋陳兵水南玘榮又
說甘卓卓遂背敏敏率萬餘人將與卓戰未獲濟榮以
白羽扇揮之敏衆潰

晉書

廣字敬平封永世縣侯

宜興志

晉施彬安吉人初令山陰累官信安義興二郡太守歷
尚書左丞征西大將軍太興元年以功封中蠲侯食

邑本縣一千三百戶謚曰明

參談志安吉志彬一作斌

沈孟頫宋左光祿大夫戎八代孫

勞志

沈田子字敬光父穆父為宗人沈預所告遇害田子及弟林子志復父仇卒斬預首祭父祖塚後破盧循爵都鄉侯入關以擅戮王鎮惡見殺林子以其子亮為之後

沈約
宋書

田子請鎮惡計事使宗人敬仁於坐殺之

沈林子字敬士從宋武帝伐姚泓破泓弟紹軍擄以千數悉獲紹器械資實時諸將破賊皆多其首級而林子

獻捷書至每以實聞武帝問其故林子曰夫王者之師
本有征無戰豈可復增張虛獲以示誇誕昔魏尚以盈
級受罰此亦後乘之良轍也武帝曰乃所望於卿也歷
封漢壽縣伯贈征虜將軍謚曰懷伯少子璞字道真累遷
淮南太守元凶弑立璞以奉迎之晚見殺

沈邵字道輝林子子涉獵文史襲爵駙馬都尉奉朝
請會彊弩將軍缺上詔錄尚書彭城王義康曰沈邵
人身不惡吾與林子周旋異常可以補選於是拜彊

弩將軍出為鍾離太守在郡有惠政子侃嗣封官至
南沛郡太守

沈亮字道明林子子也清操好學善屬文未弱冠州
辟從事會稽太守孟顗在郡不法亮糾劾免官歷義
成太守蒞官清約為太祖所嘉每遠方貢獻絕國勲
器輒班賚焉又賜書二千卷

沈淵字敬深少有志節隨高祖克京城封繁峙縣五
等侯叅知鎮軍車騎中軍事子正字元直淹詳有風度

美丰姿善容止好老莊之學弱冠辟州從事演之稱之
曰此宗中千里駒也隨王誕鎮會稽叅安東軍事元凶
弑立分江東為會州以誕為刺史誕將受命正說司馬
顧琛曰國家此禍開闢未聞今以江東義銳之衆為天
下倡始若馳一介四方詎不響應此以雪朝廷冤恥大
明臣子之節豈可北面凶逆使殿下受其偽寵琛曰江
東忘戰日久士不習兵雖云逆順不同然強弱有異當
須四方有義舉者應之不為晚也正曰天下若有無父

之國則可矣苟其不爾寧可自安仇恥而責義於餘方
今正以弑逆冤醜義不同戴舉兵之日豈必求全耶馮
衍有言大漢之貴臣將不如青齊之賤士乎况殿下義
兼臣子事實家國者哉琛乃與正俱入說誕誕猶豫未
決會潯陽義兵起世祖使至誕乃加正寧朔將軍孝建
元年除齊北海二郡太守

沈雲子淵子弟元嘉中為晉安太守雲子子煥字士
蔚少為駙馬都尉奉朝請歷散騎侍郎南昌令有能

名元徽中遷寧遠將軍交州刺史雲子又有弟虔子
沈慶之歷司空封始興郡公每履行田園無人從行遇
之者不知其為三公也朝廷賜慶之三望車慶之曰吾
每遊田園有人時與馬成三無人時與馬成二今乘此車
安所之乎柳元景與顏師伯嘗詣慶之鳴笳列卒滿道
會慶之在田見之曰吾與諸公並起貧賤一時遭際榮
貴至此惟當共思損挹之事老子年已八十見成敗已
多諸君炫此奇服欲何為乎挿杖而芸不為之顧

宋書
慶

之字

弘先

卷八

竟陵王誕反以慶之為兗州刺史率衆討之至歐陽
誕遣慶之宗人沈道愍齋書說慶之餉以玉環刀慶
之遣道愍數以罪惡慶之至城下誕登樓謂之曰沈
君白首之年何為來此慶之曰朝廷以君狂愚不足
勞少壯故使僕來耳慶之兄子僧榮時為兗州刺史
鎮瑕丘遣子懷明率數百騎詣受慶之節度

沈慶之弟邵之元嘉中廬陵王行叅軍兄子僧榮敝

之之子也孝建初為安成相荆江叛發兵拒臧質質遣其安成相臧眇之討僧榮擊破之大明中為兗州刺史子懷明建威將軍封吳興縣子歷南兗州刺史義陽王祖反沈慶之從帝渡江總統衆軍少子文耀年十餘歲善騎射帝愛之封永陽縣侯食邑千戶

沈法系字體先慶之從弟亦有將才世祖伐逆加寧朔將軍領三千人前發與柳元景旦至新亭元景居中營宗慤居西營法系居東營東營據岡賊攻元景法系臨

射之所殺甚衆法系塹外樹悉伐之令倒賊劬來攻
緣樹以進彭排多開隙選善射手的發無不中事平
以為始興太守討蕭簡於廣州斬之廣州平封庫藏
付鄧琬而還官至驍騎將軍潯陽太守

慶之長子文叔位侍中廢帝賜慶之死文叔引藥自
殺文叔子昭明位秘書郎聞父死曰何忍獨生亦自
縊死元徽元年還復先封時改始興為廣興昭明子
曇亮襲廣興郡公

沈演之字臺真歷吏部尚書雖未為宰相任寄不異素有
心氣疾病歷年上使卧疾治事性好舉才申濟屈滯而
謙約自持上賜女伎不受車駕拜京陵演之以疾不從
上還宮召見自勉到坐出至尚書下省暴卒追贈散騎
常侍金紫光祿大夫諡曰貞侯子睦至黃門郎通直散
騎常侍大明初坐要引上左右俞欣之訪評殿省內事
又與弟西陽王文學勃忿閭不睦坐徙始興郡

沈赤黯歷廷尉卿勁之演之祖也

演之兄融之子暢之襲寧新縣男大明中為海陵王
諮議叅軍子畢嗣齊受禪除

沈勃好為文章善彈琴能圍碁而輕薄逐利泰始中為
太子右衛率加給事中時欲北討使勃還鄉里募人多
受貨賄上怒下詔徙付梁州元徽初以例得還結阮佃
夫王道隆等復為司徒左長史為廢帝所誅順帝即位
追贈本官勃弟統大明中為著作佐郎

沈伯玉字德潤虔子子也溫恭有行業能文章歷衛尉

丞世祖舊臣故佐普皆升顯伯玉自守私門朔望未嘗
問訊顏師伯戴法興等並有藩邸之舊一不造問由是
官次不進上以伯玉容狀似畫圖中仲尼像常呼為孔
某舊制車駕出行衛尉丞直門常戎服張永謂伯玉曰
此職乖卿志王景文亦與伯玉有舊常陪輦出指伯玉
白上孔某竒形容上於是特聽伯玉直門服玄衣累遷
永世令有能名伯玉性至孝奉親有聞未嘗妄取於人
有物輒散之故知弟仲玉泰始末為寧朔長史蜀郡太

守

沈攸之字仲達歷荊州刺史宋季起義雍州刺史張敬
兒襲之先是攸之自江陵下以邊榮為留府司馬守城
城敗見敬兒敬兒問曰邊公何為同人作賊不早來榮
曰沈荊州舉義兵匡社稷身雖可滅要是宋室忠臣天
下尚有直言之士不可謂之為賊身本不靳生何須見
問敬兒命斬之榮歡笑而去容無異色

沈攸之父叔仁為衡陽王義季征西長史兼行參軍

鎮彭城

沈攸之弟登之新安太守去職在家為吳興太守沈文秀所收斬弟雍之鄱陽太守雍之與攸之異生諸弟中最和謹尤見親愛雍之弟榮之尚書庫部郎宋書攸之長子元琰司徒左長史第二子懿太子洗馬第三子文和中書郎

沈攸之從子懷寶為晉安王將師在赭圻遣親人楊公讚賫密書招誘攸之攸之斬公讚封懷寶書呈太

宗尋尅赭圻

沈文秀字仲遠慶之弟子也父邵之南中郎行參軍文秀宋前廢帝時累遷青州刺史將之鎮部曲出次白下文秀謂慶之以帝狂悖禍在難測欲因此衆力圖之慶之不從既行慶之果見殺又遣直閤張方興領兵誅文秀未至而明帝已定亂時晉安王子勛據潯陽文秀與徐州刺史薛安都並同子勛反潯陽平定明帝遣其弟文炳召之便歸命詣罪即安本任封新城縣侯先是冀

州刺史崔道固亦據歷城同反文秀遣信引魏魏遣慕容白曜援之及至而文秀已受朝命文秀善於撫御後魏圍三載無叛者五年為魏所剋終於北

並上

白曜既下歷城并力攻討自夏至春始克文秀取所持節衣冠儼然坐於齋內亂兵入曰文秀何在文秀曰各二國大臣無相拜禮白曜忿之因至撾撻後還其衣為之設饌與長史房天樂司馬沈嵩等鎖送京師面縛數罪宥待以下客給以粗衣疏食獻文重其

節義稍亦嘉禮之拜外都下大夫太和三年遷外都
大官孝文嘉其忠於其國賜絹綵二百疋後為征南
都將臨發賜以戎服除懷州刺史假吳郡公

後魏書

沈文秀子保冲大和中奉朝請大將軍宋王外兵叅軍
後為南徐州冠軍長史二十一年坐援漣口退散有司
處之死高祖詔曰保冲文秀之子可特原命配洛陽作
部終身既而獲免

後魏書

沈高文秀族子聰明有筆札文秀以為司馬甚器重之

隨文秀至懷州

沈陵字道通亦文秀族子太和十八年高祖南伐陵攜族孫智度歸降引見於行宮陵資質妍偉詞氣辯暢高祖奇之禮遇亞于王肅

並上

沈懷文字思明父宣新安太守懷文嘗為楚昭王二妃詩見稱於世除尚書殿中郎隱士雷次宗被徵居鍾山後南還廬岳何尚之設祖道文士畢集為聯句詩懷文所作尤美辭高一座遷揚州別駕從事史江夏王義恭

遷西陽王子尚為揚州居職如故時熒惑守南斗上乃廢西州舊館使子尚移居東城以厭之懷文曰天道示變宜應之以德今雖空西州恐無益也不從而州竟廢矣大明二年遷尚書吏部郎

宋書

沈懷遠懷文弟為始興王濬參軍深見親待坐納王鸚鵡為妾世祖從之廣州使廣州刺史宗慤於南殺之會南郡王義宣反懷遠頗閑文筆慤起義使造檄書并銜命至始興與始興相沈法系論起義事平慤具為陳

請由此見原至武康令撰南越志及文集並傳於世

邱淵之字思元烏程人博學有才識文帝即位以舊恩
歷侍中都官尚書吳郡太守龍鄉侯所著文章一百卷

勞
志

黃回率衆出新亭諸將任侯伯彭文之王宜興等謀應
袁粲攻高帝於朝堂事既不果高帝撫之如舊回與宜
興素不協斬之宜興吳興人也形狀短小而果勁有膽
力少年時為劫不須伴郡縣討逐圍繞數十重終莫能

擒嘗舞刀楯回使十餘人以水交洒不能著明帝泰始

中為長壽縣男至是被殺

宋書黃
回傳

張按宜興謀應袁粲此不肯作褚淵生者也世僅知
仲達宋世忠臣未有齒宜興者可慨然

吳興邱珍孫言論嘗侵蔡興宗珍孫子景先人才甚美
興宗與之周旋及景先為鄱陽郡會晉安王子勛為逆
轉在竟陵為吳喜所殺母老女幼流離夏口興宗至郢
州親自臨哭致其喪柩家累皆得東遷

宋書

珍孫歷寧朔將軍見褚伯玉傳

丹徒縣令沈攢之以清廉抵罪邛寂之曰庶吏真不可為也政當處季孟之間攢之吳興武康人性疎直在縣自以清廉不事左右浸潤日至遂鎖繫尚方嘆曰一見天子足矣上召問曰復欲何陳對曰臣坐清所以獲罪上曰清復何以獲罪曰無以承奉要人上曰要人為誰攢之以手板四面指曰此赤衣諸賢皆是若臣得更鳴必令清譽日至攢之雖危言上亦不責後知其無罪重除

丹徒令入縣界吏人候之謂曰吾今重來當以人肝代之不然清名不立

南史

吳興脩志卷八